

Kurŏ Fesiya Od

Od Uyu Irouya

¹ Jesus Kristus nē kurŏ fesiya od, are ereb kaisā bagai wō youf anī, Negurem yogon ferfer ifelnēdiyof nigin Jesus ifenen. Jesus ī, yogon ferfer Jon od anī keleĩ youf nigin, yogon engel Jon bun sur fen.

² Jonem ereb ereb ganan ī ilen anī kurŏ falaisif, are Negur nē od ado, Jesus Kristus nē od.

³ Taka ī profet od enei iwesef are ī el fiyek, agef fen, idi anī karī de fen, ereb anī bun itoton anī waud bun dinof anidi el fedif, ere nigin, sain mogo dodolef.

Jon Sios Sewen Bun Yogon Aanya Sur Fen

⁴ Aya Jon,

Asia provins bun sios sewen bun pas enei atotof.

Negur ī gama ibodok, kulu ibodon, dumen isiyof bunem, uur sewen yogon king nē sia wagen difaref bunem ado,

⁵ Jesus Kristus ī Negur nē od el fe dōf wogō yedig, ī tamo gare den bun tamal uyulil kel turī fiyen, tenebur king ganan neid mudur ī bunem, wau ifenēya ado wau inosiya ā bun isif.

Jesus ī ada nigin wau laaf fen, yogon naud bunem, ada neda mosor bun tamal yalelnadan.

⁶ Agef fen, ī ada yogon Tama Negur aruna yaleya nigin, in tano ado in pris inodan. Ī bun

fula fiya medeīya ado megeir gai gai ibodkalauf!
Mmoi.

⁷ Log, ĩ lalo bunem isif.

Age fe di, meleid ganan ĩ dilouf,
idi ĩ gilī difen anidig dilouf.

Age fe di, tamo kayau tenebur ein ganan ĩ
nigin waud gudū fouf.

Are agef bagai wō youf! Mmoi.

⁸ Odug Negur irok, “Aya uyulil ado idikeleya,
aya gama abodok, kulu abodon, dumen asiyouf,
aya saa ilun nē kusī tamo guri afeid uyu aroudig
anī.”

Taka ĩ Tamo Naal Gen

⁹ Aya Jon, āgenei tureī, aya, Jesus bun darau,
Negur nē tano ado, feseya sā ifareya, ā geid
taledig, aya Negur nē od ado Jesus nē od wogō aun
nigin, Patmos nuyo bun abodon.

¹⁰ Odug nē naa bun, aya Awa Uur namen abod
ken, aya dumeun ait odug taur gen wō ye mog,
karī aun.

¹¹ Ait iron, “Ereb ō ulef anī, buk kori fiya
bun utot fen, sios sewen bun sur wediyouf, oun
Efesus, Smerna, Pergamum, Taiataira, Sardis,
Filadelfia ado, Laodisia.”

¹² Aya ait wogō fiyan anī iley a nigin falei aun.
Aya falei aul fen, lam nē gol tutur sewen ailedin.

¹³ Lam tutur anī atun, aib taka “tamo naal
gen”* kolos meluk ifonū di, yen isilen ado, let gol
akor gu fen anī ifaren.

¹⁴ In mudur ado fatiya, sipsip siwi lalau, saa lalo
lalau gen, yogon mala are yā mala fitotoleya gen.

* **1:13:** Daniel 7:13

¹⁵ Yogon ye are bras yā malan ifalegeya medeīya gen, in ait are naan uhuhuya gen.

¹⁶ Yogon ima biyalē barisa sewen iron, agef fen, in awa bun tamal, dimig bala waila si sitakā wō yen. Yogon nawa are gaa ririya gen medeī yen.

¹⁷ Aya ī ail fen, aya ī ye gariyan kubū au, laa gen ainen. Age afe di, ī ima biyalē aya teteun ino fen, iron, “Ō to kumī wo. Aya gariya, aya idikeleya.

¹⁸ Aya mata ibodōya nē, aya laa fiyan, anī ere, uleyaf, aya gai gai mata abodkalauf! Aya laa nē ado Hades nē ki aroudif.

¹⁹ “Anī nigin, erēb ō ulen, erēb gama ibodok, erēb dumen wō youf anī utot.

²⁰ Barisa sewen aya imau biyalē ulen ado, lam nē gol tutur sewen ulen anī nē waa nē gariya, are eig fiya: Barisa sewen are sios sewen neid engel, lam nē tutur sewen are sios sewen.

2

Efesus Sios Bun Od Ilef

¹ “Efesus sios nē engel bun utot:

Od enei are, ī barisa sewen ima biyalē iron mog, sewen gol lam tutur difaren atun iyok ilen nē od:

² Erēb ō ago wof, are aya keleī, ogon kabī total yaleya ado ogon feseya sā ifareya anī. Aya keleī, ō tamo sesen to loloum weid fen, idi dogo anī aposel dedig, anī ere, aposel sā anidi es wiyeīd fen, idi neid idegēya anī ulen.

³ Ō total ufar fen, neu yanau nigin morō faali won, anī ere, ō to fō yon.

⁴ Anĩ ere, aya õ nigin od enei ado: Õ uruwa aya nigin waũ laa fen anĩ utoron.

⁵ Anĩ nigin, õ nainenem kubũ won anĩ kisi wo! Falei wo fen, ereb uruwa agon anĩ agouf. Õ to falei wouf are, aya õ gein asi fen, ogon lam tutur ado yogon modoũ bun tamal alelauf.

⁶ Anĩ ere, tobonunã biya enei õ ado: Õ Nikolas dõ difiyek neid tobonuneid to oroyõdig, are ayag to oroudig.

⁷ Taka ĩ weder adouf, utornëg len, ĩ Awa Uur sios irokenëdif anĩ karĩ youf. Aib ĩ kusĩ anĩ wal fouf, aya ĩ mata ifenëya nẽ aa Negur nẽ paradis bun ibodok anĩ bun tamal, yõya nigin yo afiyëf.

Smerna Sios Bun Od Ilef

⁸ “Smerna sios nẽ engel bun utot:

Od enei are, ĩ gariya ado idikeleya, ĩ laaf fen, baban mata fã yen nẽ od.

⁹ Ogon darau ado ogon maleg nigin aya keleĩ, anĩ ere, õ safina musei ado. Aya idi dogo nigin Juda tamo dedig, anĩ ere, idi Juda tamo sã, Satan nẽ guru fiya anidi neid bou yũya od nigin keleĩ.

¹⁰ Ereb mogo õ darau ifonõf nigin to kumĩ wo. Aya õ arokonok, Satan ĩ mogo ã tunĩ kisi yeĩya nigin kalabus bun ineneĩf. Age fe di, ã naa ten darau walogouf. Õ laa bun dinenõfeg, ogon momoiya urou kafĩ walauf, ago di, aya õ mata nẽ teter kurũ ayõf.

¹¹ Taka ĩ weder adouf, utornëg len, ĩ Awa Uur sios irokenëdif anĩ karĩ youf. Aib ĩ kusĩ anĩ wal fouf, namba tu nẽ laa ĩ to daũ fiyëf.

Pergamum Sios Bun Od Ilef

12 “Pergamum sios nē engel bun utot:

Od enei are, ĩ dimig bala waila si sitakā ado nē od.

13 Ō ubodok nē an aya keleĩ, an Satan nē sia ibodok. Anĩ ere, ō neu yanau urou kafĩ welef. Antipas, neu dō fiya biya, aya nigin od wogō yedig, ĩ Satan ibodok nē āgenei taun an dukesin sain anĩ buneg, ō aya nigin ogon momoiya to folō welen.

14 Anĩ ere, aya ō nigin od tunĩ ado: Ō tamo tunĩ an Balam nē keleĩ dirouf anidi ado, Balam ĩ Balak ifelnē di, Balak ĩ Israel tamo kayau yeid tũ fiya nē meein ino fen, idegnēdi di, Israel idi saaf idegēya waitou bun sesewi difen anĩ dokon, noli tobonunā dinon.

15 Age fiya gen, ō aneg tunĩ Nikolas nē ifelnēya dirouf anidi ado.

16 Anĩ nigin, waũ falei wo! Sāf are, aya kaisā bagai ō gein asi fen, neu sigorou nē dimig ado idi geid kušĩ auf.

17 Taka ĩ weder adouf, utornēg len, ĩ Awa Uur sios irokenēdif anĩ karĩ youf. Aib ĩ kušĩ anĩ wal fouf, aya ĩ mana iminēyan ibodok tunĩ afenēf. Aya ĩ meein lalau takag, yana mata teten itoton anĩ afenēf. Aib ĩ anĩ yalef dogol yana anĩ keleĩ youf.

Taiataira Sios Bun Od Ilef

18 “Taiataira sios nē engel bun utot:

Od enei are Negur Naal nē od, yogon mala are yā mala fitotoleya gen, yogon ye are bras yā malan ifalegeya medeĩya gen.

¹⁹ Aya keleĩ, ò ereb agof, ogon waũ laa fiya ado momoiya, ogon aruna yaleya ado feseya sã ifareya. Aya keleĩ, ò uruwa bun ago won anĩ wal fiya gama ò agodig.

²⁰ Anĩ ere, aya ò nigin od enei ado: Ò kayau Jesebel, ĩ yogo nigin profet kayau yef anĩ, loloum wedig. ĩ yogon ifelnēya bunem neu ferfer idegnēdi di, idi noli tobonunã bun dile fen, saaf idegēya waitou sesewi difen anĩ dōdig.

²¹ Aya ĩ yogon mosor nigin wau falei youf nigin sain afenen, anĩ ere, ĩ to orof.

²² Anĩ nigin, aya ĩ darau nē fatar bun ara ken, idi ĩ geid seseirã dinodig anidi, kayau anĩ nē naab nigin waud to falei youf are, aya idi darau fatuk bagai afenēdiyof.

²³ Aya ĩ gere tar adenkesiyof. Age afe di, sios ganan, aya waud ado kisi es afedig anĩ keleĩ youf. Age afe fen, aya ã mugu mugu ereb ereb ã ago gef kilei, mala solo afeneĩf.

²⁴ Anĩ ere, aya ã tunĩ ganan Taiataira ufaregef anĩ arokeneik, ã kayau anĩ nē ifelnēya to uroug fen, Satan nē waa namen bagai dedig anĩ to kelein anĩ arokeneik (aya ã bun ereb morō taka to afeneĩf).

²⁵ Ereb ã urougef anĩ dogol urougef uleg mog, asiyof.

²⁶ Aib ĩ kusĩ anĩ wal fe fen, neu oroya dōf ile, idikeleya bun ouf, aya ĩ teneub lo fediya nigin megeir afenēf.

²⁷ ‘Ī ain manig nem ulum irokenēdiyof,
ĩ mis gen daũ fedĩ di, urud falaisiyof,’*

* 2:27: Sam 2:9

are aya neu Dei bunem megeir alen gen.

²⁸ Aya ĩ bonimei nē barisa kilokilog afenēf.

²⁹ Taka ĩ weder adouf, utornēg len, ĩ Awa Uur sios irokenēdif anī karī youf.

3

Sardis Sios Bun Od Ilef

¹ “Sardis sios nē engel bun utot:

Od enei are, ĩ Negur nē uur sewen ado barisa sewen irouf anī nē od. Ō ereb agof, are aya keleĩ. Ō mata ubodok dedig, anī ere, ō laa yon.

² Fã wale! Ereb mogo laa fou fenē anī megeir wenē, ere nigin, aya ō ereb agof are neu Negur nē mala bun tutuk bagai sã ailef.

³ Anī nigin, ereb ō walen, ereb ō karī won anī karī walauf. Anī dō wo fen, waũ falei wo. Ō to fã walouf are, aya bē tamo gen asiyouf. Aya sain nanĩ be, ō gein asiyouf anī, ō to keleĩ youf.

⁴ Anī ere, ō, Sardis an tamo kayau tunĩ, idi neid kolos amuyē fiya sã difaref anidi ado. Idi kolos lalau difoun ken, aya geid mayōf, ere nigin, idi kisi feleya bagai.

⁵ Aib ĩ kusĩ anī wal fouf, ĩ idi gen kolos lalau ifonũf. Aya yogon yana, mata ibodōya nē buk bun tamal to alelauf, age afe fen, yogon yana neu Dei ado yogon engel meleid bun kurō afesiyouf.

⁶ Taka ĩ weder adouf, utornēg len, ĩ Awa Uur sios irokenēdif anī karī youf.

Filadelfia Sios Bun Od Ilef

⁷ “Filadelfia sios nē engel bun utot:

Od enei are, ĩ fateul bagai ado momoi nē od, ĩ Dawid nē ki irouf. Ereb ĩ kã fef, taka nem to inolalauf, agef fen, ereb ĩ inolelef, taka nem to kã falauf.

⁸ Ō ereb agof, are aya keleĩ. Ulef, aya, sukar kã feleya taka nem inoleleya kisi felya sã anĩ, ō wagen anon. Aya keleĩ, ō megeir naal bagai ado, anĩ ere, ō neu od dō wo fen, neu yanau to wa won.

⁹ Ulef, idi Satan nē guru fiya namen temeleid, idi dogo nigin Juda tamo dedig, anĩ ere, idi Juda tamo sã, idegēya tamo anĩ, ayam age afe di, idi disi, ō yē gariyan kubũ de fen, aya ō nigin wau laa fedig anĩ idi keleĩ youf.

¹⁰ Ō feseya sã ufarauf nigin neu od urou kafĩ welen anĩ nigin, ayag idi tenebur dibodok kisi fediya nigin teneub ganau bun darau isiyouf sain bun, aya ō ahaha ayōf.

¹¹ Aya kaisã bagai asiyouf. Ō ereb urouf anĩ kafĩ walauf, ago dī, taka nem ogon kurũ fiya nē teter anĩ to yalouf.

¹² Aib ĩ kusĩ anĩ wal fouf, aya, neu Negur nē tempel bun, ĩ monog tor atennēf. ĩ anĩ baban to bagai itorōf. Aya ĩ bun, neu Negur nē yana ado, neu Negur nē taun yana, Jerusalem mata, are saa ilun tamal neu Negur bunem isiyouf anĩ atotau. Age afe fen, aya neu yanau matag ĩ bun atotau.

¹³ Taka ĩ weder adouf, utornēg len, ĩ Awa Uur sios irokenēdif anĩ karĩ youf.

Laodisia Sios Bun Od Ilef

¹⁴ “Laodisia sios nē engel bun utot:

Od enei are Momoi Barikã nẽ od, ï dõ fiya biya ado, momoi bagai Negur nẽ od wogõ yedig, ï ereb ereb Negur inodin ganan nẽ gariya.

¹⁵ Õ ereb agof anĩ aya keleĩ, are õ medir sã, uruwag sã. Aya õ medir be, uruwa anĩ taka ubodok nigin orouf.

¹⁶ Anĩ nigin, õ laigog, medir sã, uruwag sã nigin, aya õ mogo awau bun tamal atigil arãyoõf.

¹⁷ Õ urõdig, ‘Aya safina ganan kisi feleya, aya safina musei alen nigin, aya ereb taka to lau afedig,’ wodig. Anĩ ere, õ keleĩ sã, õ gai sane bagai, malalon ado, maleg, malã ifofakeleya ado, gemũ ubodok.

¹⁸ Aya õ arokonok, õ aya bun gol bagai, gol yã bun difalegen anĩ, õ safina ganan kisi feleya bagai wõ wouf nigin, na walouf, õ kolos lalaug ufonũ di, ogon gemũ mama dede wouf nigin na walouf, õ mala marasin malã bun uno fen, kelẽ walauf nigin na walouf.

¹⁹ Aya idi nigin wau laa fedig anidi, aya ou afeid fen, tai afedidig. Anĩ nigin, kabĩ total wale fen, mosor utor ken, waũ falei wouf.

²⁰ Lo weleg, aya bobogẽ afar fen, godu afef. Taka ï aitou karĩ ye fen, sukar kã fouf are, aya ï namen asi fen, ï ado saaf mãf, age afe di, ï aya ado saaf mãf.

²¹ Aib ï kusĩ anĩ wal fouf, aya kusĩ wal afe fen, neu Dei nẽ king nẽ sia bun, neu Dei ado mabodok gen, ïg neu king nẽ sia bun, aya ado mabodõf nigin yo afiyẽf.

²² Taka ï weder adouf, utornẽg len, ï Awa Uur sios irokenẽdif anĩ karĩ youf.”

4

King nē Sia Saa Ilun Ibodok

¹ Anī bure fele di, aya kelē aulen, aya wageun an saa ilun nē sukar kā feleya ifar mog, ailen. Age afe fen, ait aya uyulil taur gen wogō fiya di, karī aun are iron, “Ein use, ago di, ereb enei bure fele di, wō youf anī, afelnōf.”

² Kaisā bagai aya Awa Uur namen abodon, age afe fen, wageun an saa ilun king nē sia bun, aib taka ibodon anī ailen.

³ Agef fen, taka an ibodon are, lo fiya bun meein medeīya jaspera ado meein giriya medeīya konilian gen wō yen. Walol taka, meein aarau mata age fiya medeīya emeral gen sof fen, king nē sia anī kalilī fen.

⁴ King nē sia anī sirin, tuwenti-fo king nē sia anim salili de fen, tuwenti-fo mudur adodo anī bun dibodon. Idi kolos lalau difoun ken, dogo neid mudureid bun king nē gol teter ado dibodon.

⁵ King nē sia bun kolimei filiya firagagaū fe sof fen, gurūya odug wō ye di, kolimei gudū yen. King nē sia wagen lam sewen futu redin, are Negur nē awa uur sewen anī.

⁶ Takag, king nē sia wagen, ereb taka maaī gen galas nem dinon anī, galas medeīya bagai age fiya ibodon.

Anī atun king nē sia salili fiya bun, ereb mata ibodōya aiwa adodo difaren. Idi meleid barikā, wagedin ado dumedineg.

⁷ Ereb mata ibodōya uyu ifaren are laion gen, anī dō fiya are bulmakau gen, anī dō fiya are nawa, tamo nawa gen, anī dō fiya are webi fatutu yef gen.

⁸ Ereb mata ibodōya aiwa adodo idi mugu mugu wayeid sigis ado fen, bouweid ganan bun meleid barikā, wayeid farumēg meleid ado. Bō ado gaa ado, idi eig yeya to folō difeledig:

“Fateul, fateul, fateul
are Odug Negur saa ilun nē kusī tamo guri feid
uyu iroudig anī,
ī kulu ibodon, ī gama ibodok, ī dumen isiyouf.”

⁹ Ereb sain ererb mata ibodōya idi, taka ī king nē sia bun ibod ken, mata faimud ibodkeleya anī bun, fula fiya medeīya, yana odug ado, de fiyēya difenēdig bun,

¹⁰ mudur adodo tuwenti-fo, ī king nē sia bun ibod mog, ī wagen kuku de fen, ī mata faimud ibodkeleya anī seli dalesedig. Idi king nē sia wagen dogo neid teter gō difel fen, dirōdig:

¹¹ “Nemā Odug Negur,
ō fula fiya medeīya, yana odug ado, megeir yaleya
kisi feleya bagai,
ere nigin, ō ererb ererb ganan ago di, wowā den,
ago fen, ogon oroya bunem idi unodi di,
age de difaref.”

5

Buk Kori Fiya Ado Sipsip Naal

¹ Age de di, aya ī king nē sia bun ibodon anī ima biyalē, buk kori fiya si sitakā itotoya ado uris sewen nem itā de fen, sile fiyan anī ailen.

² Age afe fen, aya engel megeir ado taka ailen, ī ait odugem iweig iron, “Aim uris eneidi narī feid fen, buk kori fiya enei fara feleya kisi feleya?”

³ Anĩ ere, saa ilun be, tenebur be, teneub farumen tamal, taka nem buk kori fiya anĩ fara feleya be, namen fele fiya kisi feleya sã.

⁴ Aya fatuk bagai inã alen, ere nigin, taka nem buk kori fiya anĩ fara feleya be, namen fele fiya kisi feleya to wõ yen.

⁵ Age afe di, mudur adodo takam aya irokanan, “To inã wale! Ulef, Juda nẽ ibor bun tamal Laion, Dawid nẽ Warei mogo kusĩ wal fen. Inim, sã buk kori fiya anĩ yogon itãfiya uris sewen ado fara falauf.”

⁶ Age ye di, aya Sipsip Naal dukessin anĩ gen, king nẽ sia erub mata ibodõya aiwa adodo salili difiyen ado, mudur adodo atun ifar mog, ailen. Ī karat sewen ado mala sewen ado, mala sewen are Negur nẽ awa uur sewen teneub ganan bun susur fedin anidi.

⁷ Sipsip Naal ĩ isi fen, ĩ king nẽ sia bun ibodon anĩ nẽ ima biyalẽ buk kori fiya anĩ yalen.

⁸ Sain ĩ anĩ yalen, erub mata ibodõya aiwa adodo, mudur adodo tuwenti-fo geid, Sipsip Naal wagen kuku den. Idi mugu mugu harp* ado beĩ gol nem kaau sumeĩ biya isokoseya ado guri difen, kaau sumeĩ biya are momoiya tamo kayau neid kosẽ.

⁹ Age de fen, idi seg mata dalen:
 “Ō buk kori fiya anĩ wale fen,
 yogon itãfiya uris sewen anĩ fara feleya kisi
 feleya bagai,
 ere nigin, õ dinõkesi di,
 õ ogon naud bunem

* **5:8:** Harp anĩ gita gen musik kodẽ dedig.

ibor ganan bun, od fire fire ganan bun, tamo
kayau ganan bun ado, teneub ganan bun,
Negur nē tamo kayau na waledin.

10 Ō idi neda Negur aruna dalouf nigin, tano ado
pris unenēdin,
ago di, idi teneub ganan lo fiya nigin mudur
dibodōf.”

11 Age de di, aya malau ara ken, engel musei
bagai neid aiteid karī aun, idi tausen musei ado
handred tausen musei wal fiya. Idi king nē
sia, ereb mata ibodōya ado, mudur adodo salili
difiyēdin.

12 Age de fen, idi aiteid odugem seg dalen:
“Sipsip Naal dukesin ī
megeir, safina, kisi biya, total, yana odug, fula fiya
medeīya ado,
yana yaleseya yaleya kisi feleya magari!”

13 Agef fen, aya, ereb ereb ganan saa ilun
difaref, tenebur difaref, teneub farumen difaref
ado, maaī bun difaref, ereb ereb ganan anī na-
men mata difaref idi seg dale mog, karī aun:

“Ī king nē sia bun ibodok ado Sipsip Naal bun,
yana yaleseya, yana odug, fula fiya medeīya ado,
megeir,
gai gai ibodkalauf!”

14 Ereb mata ibodōya aiwa adodo diron, “Mo-
moi,” age de di, mudur adodo kuku de fen, yana
dalesen.

6

¹ Aya lo afe mog, Sipsip Naal ïtãfiya uris sewen anñ uyulil fara fen. Age fe di, aya, ereb mata ibodōya aiwa adodo takam, ait kolimei ait gen bun eig ye mog, karĩ aun, “Usi!”

² Aya lo afen, aya wageun an hos lalau taka ifaren. Tamo anñ teten ibodon ï wi taka iron, ï kusĩ wal fiya nẽ teter ifenen, age fe di, ï hos bun kusĩ wal fe fen, kusĩ wal fediyof nigin ilen.

³ Sipsip Naal ïtãfiya uris uyulil dō fiya anñ fara fen, age fe di, aya ereb mata ibodōya uyulil dō fiya anñ eig ye mog, karĩ aun, “Usi!”

⁴ Age ye di, hos taka isin, are giriya bagai. Tamo anñ teten ibodon ï, tenebur tamal malol yalel fen, tamo abob didenkesiyof nigin megeir ifenen. ï anñ dimig odug ifenen.

⁵ Sipsip Naal ïtãfiya uris anñ dō fiya fara fen, age fe di, aya ereb mata ibodōya anñ dō fiya anñ eig ye mog, karĩ aun, “Usi!” Aya lo afen, aya wageun an hos karos taka ifaren. Tamo anñ teten ibodon, yogon ima bun ï foi fiya nẽ safina iron.

⁶ Age fe di, aya ereb mata ibodōya aiwa adodo atun ait taka gen karĩ aun are iron, “Naa tekelei nẽ mala solo wit bret tekelei yalouf, naa tekelei nẽ mala solo baali bret towo yalouf. Ago fen, oliv moul ado wain to daũ wo!”

⁷ Sipsip Naal ïtãfiya uris anñ dō fiya fara fen, age fe di, aya ereb mata ibodōya anñ dō fiya anñ eig ye mog, karĩ aun, “Usi!”

⁸ Aya lo afen, aya wageun an hos bailuya taka ifaren. Tamo anñ teten ibodon ï yana Laa, age fe di, Hades ï degẽ degẽ fiyen. Idi tenebur tamo kayau aiwa adodo foi fiya atun taka anñ, dimig nem, kadir nem, dagi odug nem ado,

tenebur gaar kuĩ nem didenkesiyouf nigin megeir ifenēdin.

⁹ Sipsip Naal ĩ ĩtāfiya uris anĩ dō fiya fara fen, age fe di, aya idi Negur nē od dale fen, feseya sã od anĩ wogō de di, didenkesin anidi neid meleidkanon alta farumen ailedin.

¹⁰ Idi aiteid odugem diweig diron, “Ereb ereb ganan nē Odug, fateul fen momoi, ere sain bun bagai, ō tenebur tamo kayau es woid fen, idi amã didenamakesin nigin mala solo wenēdiyof?”

¹¹ Age de di, idi mugu mugu kolos lalau meluk ifenēdin, agef fen, idi naal sain meluk tari de mog, dogo neid kabĩ tureid tar ado momoiya tamo kayau Negur igirnēdin ganan, idi age difedin gen didenkesiya kisi falauf nigin irokenēdin.

¹² Aya ĩ ĩtāfiya uris anĩ dō fiya fara fel mog, ailen. Age fe di, mimĩ odug wō yen. Gaa gugum kel fen, wau gudū fiya nē gabar meme siwi nem iwaya gen karos kelen. Ogō oditekei naud giriya gen falei felen.

¹³ Age fe di, saa ilun barisa tenebur kuku ren, are aa fig faat dobi yau totolem yoũ fe di, kuku redig gen age fen.

¹⁴ Saa, pepa kori fiya gen iwaikelen, agef fen, arei ganan ado nuyo ganan, dogo neid modoũ ditoraran.

¹⁵ Age fe di, tenebur nē king, tamo yeneid adodo, kusĩ mudur, safina musei adodo, megeir adodo ado, ferfer ganan ado tamo kafĩ fiya sã bun difaref ganan, kuren ado arei nē sa atun diminanan.

¹⁶ Idi arei ado sa diweig dirokenēdin, “Tetena-man kubũg fen, ĩ king nē sia bun ibodok anĩ nawa

ado Sipsip Naal nē didi bun tamal unokolnamāg!

¹⁷ Ere nigin, idi neid didi nē naa odug mogo isin, anī nigin, aim ifareya kisi feleya?”

7

Israel Tamo Kayau 144,000 Bun Uris Dinon

¹ Anī bure fele di, aya engel aiwa adodo, teneub idikeleya uyu uyu aiwa adodo bun, difar fen, teneub uyu uyu aiwa adodo nē yau, yau takam teneub be, maaī be, aa taka bun to fū foug nigin kafī difel mog, ailen.

² Age afe fen, aya engel taka mata ibodōya Negur nē itāfiya uris ado gaa iseyan ise mog, ailen. Ī engel aiwa adodo teneub ado maaī daū fiya nē megeir ifenēdin anidi, ait odugem iweig irokenēdin:

³ “Ā teneub be, maaī be, aa taka fau mog to daūg, amā neda Negur nē ferfer demeid bun itāfiya uris manol len.”

⁴ Age ye di, aya idi itāfiya nē uris dinon anidi ganī anī karī aun, are 144,000 idi Israel ibor ganan bun temeleid.

⁵ Juda nē ibor bun tamal 12,000 are itāfiya uris dinon,

Ruben nē ibor bun tamal are 12,000,

Gad nē ibor bun tamal are 12,000,

⁶ Aser nē ibor bun tamal are 12,000,

Naftali nē ibor bun tamal are 12,000,

Manase nē ibor bun tamal are 12,000,

⁷ Simeon nē ibor bun tamal are 12,000,

Lewi nē ibor bun tamal are 12,000,

Isakar nē ibor bun tamal are 12,000,

⁸ Sebulun nē ibor bun tamal are 12,000,

Josef nē ibor bun tamal are 12,000,
Benjamin nē ibor bun tamal are 12,000.

Guru Fiya Mala Odug Kolos Lalau Meluk Difonundin

⁹ Anī bure fele di, aya lo afen, aya wageun an guru fiya mala odug bagai, taka nem iwesleya kisi feleya sã, idi teneub ganan bun, ibor ganan bun, tamo kayau ganan bun ado, od fire fire ganan bun temeleid, idi king nē sia wagen ado Sipsip Naal wagen difaren. Idi kolos lalau meluk difoun ken, pam boge anã boge gen anī imedim guri difen.

¹⁰ Age de fen, idi aiteid odugem diweig diron:
“Kel gei fiya are
neda Negur king nē sia bun ibodok ado
Sipsip Naal nē.”

¹¹ Engel ganan, king nē sia ado, mudur adodo ado, ereb mata ibodōya aiwa adodo salili difiyeid difar fen, king nē sia wagen neweid lē kuku de fen, Negur yana dalesen.

¹² Idi diron:
“Momoi!
Yana yaleseya, fula fiya medeīya,
kisi biya, de fiyēya, yana odug,
megeir ado, totol are
neda Negur bun gai gai ibodkalauf.
Momoi!”

¹³ Age de di, mudur adodo takam aya to fiyan,
“Idi eneidi kolos lalau meluk difonun are nani-
dim, idi nainenem disin?”

¹⁴ Aya ī arokenen, “Tamo biya, ō keleī.”

Age au di, ī irokanan, “Eneidi are darau, kafī
fiya odug bun temeleid disin. Idi dogo neid kolos
meluk Sipsip Naal naud nem kulo dife di, lalaun.

- 15 Anĩ nigin,
 “idi Negur nē king nē sia wagen difar fen,
 yogon tempel bun gaa ado bō ganan aruna
 daledig.
 Age dife di, ĩ king nē sia bun ibodok anim yogon
 salafat biraraũ fe fen, kerũ fediyouf.
- 16 Idi baban to naũ fediyouf,
 to naan ail fediyouf.
 Gaam be, ereb uruwa adom,
 baban to isaĩnēdiyouf.
- 17 Ere nigin, Sipsip Naal king nē sia atun ifaref
 inim, dogo neid lo fiya tamo ibodōf.
 ĩ idi mata ibodōya nē naan warur bun gurif
 iroulediyouf.
 Age fe di, Negur ĩ idi meleid bun tamal maruid
 ganan waĩ falauf.”

8

Ītāfiya Uris Namba Sewen Ado Aa Gaula Sumeĩ Biya Nē Gol Beĩ

¹ Sain Sipsip Naal ĩtāfiya uris namba sewen anĩ
 fara fele di, saa ilun hap aua age fiya karasā sā
 mutũ bagai yenen.

² Age fe di, aya engel sewen Negur wagen
 difaren anidi, taur sewen ifeneĩd mog, ailen.

³ Engel taka ĩ, aa gaula sumeĩ biya nē gol beĩ
 ado isi, alta bun ifaren. ĩ aa gaula sumeĩ biya
 musei, momoiya tamo kayau ganan neid kosē
 ado, king nē sia wagen gol alta bun sesewi foug
 nigin difenen. ⁴ Aa gaula sumeĩ biya nē kaau,
 momoiya tamo kayau neid kosē ado, engel ima
 bun tamal Negur wagen iselen.

⁵ Agef fen, engel aa gaula sumeĩ biya nẽ beĩ yale, alta bun tamal yã ife fen, tenebur iran, age fe di, kolimei gudũya, gurũya odug, kolimei filiya ado, mimĩ wõ yen.

Taur

⁶ Age fe di, engel sewen taur sewen ado, taur wese fiya nigin dodok difen.

⁷ Engel uyulil yogon taur wese fe di, uyẽ ais, yã naud ado bagu fen, isi di, tenebur iraran, age fe di, teneub tekelei faraf towo fiya gen anĩ taka adok isaikelen, aa ganan faraf towo fiya gen anĩ taka adok isaikelen, agef fen, fisir mata ganan isasaikelen.

⁸ Engel uyu wõ yen anĩ dõ fiya yogon taur wese fe di, ereb arei odug gen yã fitotoleya ado maaĩwõ iran. Maaĩ faraf towo fiya gen anĩ taka, naud falei felen,

⁹ maaĩwõ ereb ereb mata ibodõya faraf towo fiya gen anĩ taka gare den, agef fen, waag ganan faraf towo fiya gen anĩ taka daũ felen.

¹⁰ Anĩ dõ fiya engel taka yogon taur wese fe di, barisa odug yal gen kaur fen, saa ilunem, naan faraf towo fiya gen anĩ taka bun ado, naan warur anidi bun kubũ yen.

¹¹ Barisa anĩ nẽ yana Dirikeĩ. Naan faraf towo fiya gen anĩ taka dirikeĩ kele di, tamo kayau musei, naan dirikeĩ kelen anĩ bunem gare den.

¹² Anĩ dõ fiya engel taka yogon taur wese fe di, gaa faraf towo fiya gen anĩ taka, ogõ faraf towo fiya gen anĩ taka ado, barisa faraf towo fiya gen anĩ taka yũ di, idi ganan faraf towo fiya gen anĩ taka gugum kelen. Naa faraf towo fiya gen anĩ

taka lalan sa kelen, agef fen, bō faraf towo fiya gen anī takag age fen.

¹³ Aya lo afe mog, aya webi taka karī au mog, ilun fatutu ye fen, ait odugem iweig iron, “Malalon! Malalon! Malalon tenebur dibodok anidi bun, ere nigin, engel towog mogo taur ait wese difou fenē!”

9

¹ Engel anī dō fiya engel taka yogon taur wese fe di, aya barisa taka saa ilunem tenebur kubū yen anī ailen. Barisa are ku isil idīya sã nē ki anī ifenen.

² Ī ku isil idīya sã anī kã fele di, kaau are yã odug kū fiya modoū bun tamal gen fã yen. Ku isil idīya sã bun tamal kaau anim, gaa ado saa gugum kelen.

³ Age fe di, kaau namen tamal, totobi tenebur wowā den, are idi neid megeir, tenebur ābei neid megeir gen ifenēdin.

⁴ Idi tenebur tamal fisir be, ereb aayū be, aa taka to daū difouf, anī ere, tamo kayau idi Negur nē uris demeid bun sã anidi dogol daū difediyouf nigin irokenēdin.

⁵ Idi tamo idenkesiya nē megeir to ifenēdin, anī ere, idi ogō faif bun darau dogol difenēdiyof nigin megeir ifenēdin. Age fe di, idi neid darau arar, ābei tamo garū fe di, darau arar iledig gen.

⁶ Naa anidi bun tamo laa dimirēf, anī ere, to dilouf. Idi laa orodiyouf, anī ere, laa to gurug fediyouf.

⁷ Totobi are hos kusī bun ileyā nē gegen. Idi neid mudureid bun, ereb gol teter gen kurū difedin, idi neid neweid tamo neweid gen.

⁸ Nedi fatiyeid kayau fatiyeid gen, agef fen, waileid are laion waila gen.

⁹ Nedi siot kapa are ain nē siot kapa gen, agef fen, idi neid wayeid furūya are hos musei ado karis kusī bun gududu de fen, gou redig gen. ¹⁰ Idi ibud ado waileid ābei neid gen, agef fen, idi ibud nem ogō faif bun tamo kayau darau difenēdiyof nigin megeir adon.

¹¹ Idi uyu iroukenēdiya nē king ado, are ku isil idīya sā nē engel, in yana Hibru od nem are Abadon, Grik od nem are Apolion.*

¹² Morō odug uyulil anī bure felen, age fe di, morō odug uru are fau disif.

¹³ Engel namba sigis anī yogon taur wese fe di, aya ait taka gol alta Negur wagen ifaref anī nē karat aiwa adodo bunem wowā yeid mog, karī aun.

¹⁴ Ait are engel namba sigis taur ado anī iroke-nen, “Engel aiwa adodo Yufretis naan odug bun difofan anidi fara woidle.”

¹⁵ Age ye di, engel aiwa adodo are aua, naa, ogō, yar enei bun bagai, tamo teneub ganān bun fara fiya towo anī taka adok didenkesiyof nigin, dodok fedin anī folō feledin.

¹⁶ Hos teten kusī bun ileyā nē tamo anidi are 200 milion. Aya dogo neid namba karī aun.

¹⁷ Aya malau seleulā kurā fiya bun, hos adodo tamo hos tetedin dibodon anidi eig fiya ailedin:

* **9:11:** Abadon ado Apolion nē gariya, Daū Fiya Tamo.

Idi neid siot kapa are, yã giriya gen, maaĩ gegẽ gen ado, bailuya salfa gen. Hos mudureid are, laion mudureid gen, agef fen, idi eweid bunem yã, kaau ado, salfa wowã yen.

¹⁸ Tamo tenebur ganan faraf towo fiya gen anĩ taka ganan, sane towo anim, yã, kaau ado, salfa idi eweid bun wowã yen anim didenkesin.

¹⁹ Hos idi neid megeir are eweid bun ado ibud bun ibodon, ere nigin, idi neid ibud are gogour gen fen, mudureid anim tamo kayau darau difenẽdidig.

²⁰ Tamo kayau tunĩ ganan, sane eneidim to didenkesin anidi, idi imedim dinon anĩ to ditor ken, waud to falei yen. Idi kaa sesen yeneid yaleseyã to ditor ken, gol, silwa, bras, meein ado, aa nẽ idegẽya waitou, are lo fiya, kariya be, iyõya kisi felya sã anidi yeneid yaleseyã itorõya sã.

²¹ Idi tamo yukesiya, dogo neid idegẽya kosẽya, dogo neid noli tobonunã be, dogo neid bẽ yaleya tobonunã nigineg waud to falei yen.

10

Engel Ado Buk Kori Fiya Naal

¹ Anĩ bure fele di, aya engel megeir ado taka saa ilunem isi mog, ailen. Ì lalom silef fen, yogon mudur bun walol ado. In nawa gaa gen, agef fen, yogon ye are tor yã bobo reya gen.

² Ì buk kori fiya naal taka ima bun fara feleya iroun. Ì ye biyalẽ maaĩ bun iten ken, ye kilẽ teneub bun itenen.

³ Agef fen, ĩ laion ninirã ye gen ken, ait odugem iweig iron. Sain ĩ iwegin, kolimei gudũya sewen neid aiteid wogõ den.

⁴ Kolimei gudũya sewen wogõ de di, aya anĩ atotau fenẽ age afen, anĩ ere, aya ait taka saa ilunem eig ye mog, karĩ aun, “Ereb kolimei gudũya sewen wogõ den anĩ bun ĩtãfiya uris uno fen, õ to utotauf.”

⁵ Age ye di, engel maaĩ bun ado teneub bun ifar mog ailen, are ima biyalẽ saa ilun yalesen.

⁶ Agef fen, engel ĩ, Negur gai gai mata ibodkeleya, saa ado erob erob gan anĩ bun difaref, teneub ado erob erob gan anĩ bun difaref, maaĩ ado erob erob gan anĩ bun difaref inodin anĩ yana nem, wau kuturol fen, iron, “Foiya nẽ sain sã!

⁷ Anĩ ere, engel namba sewen anĩ yogon taur wese foug naa bun, Negur nẽ waa, ĩ yogon ferfer profet irokenẽdin kilei, agef wõ ye kisi falauf.”

⁸ Anĩ bure fele di, ait saa ilunem aya irokana di, karĩ aun, are baban irokanan, “Ule, engel maaĩ ado teneub bun ifaref anĩ ima bun, buk kori fiya fara feleya irouf anĩ wale,” yen.

⁹ Age ye di, aya engel garan ele fen, buk kori fiya naal anĩ ifanauf nigin arokenen. ĩ aya irokanan, “Are wale wõ wakas. Are õ namẽ bun dirikeĩ youf, anĩ ere, õ awã bun are nin te gen dan yõf.”

¹⁰ Aya buk kori fiya naal engel ima bun tamal ale on. Are neu awau bun nin te gen dan fiyan, anĩ ere, aya akalaisile di, nameun dirikeĩ fiyan.

¹¹ Age afe di, idi aya dirokanan, “Õ tamo kayau musei, teneub musei, od musei ado, king musei nigin, baban profet od wogõ wouf.”

11

Od Megeir Fiya Nē Isennēya Tamo Uru

¹ Aya sisi fiya nē tibog gen werī taka ifana fen, irokanan, “Ule fen, Negur nē tempel ado alta sisi wo fen, Negur yana an ganim dalesedig anī uwes.

² Anī ere, tempel fofomala anī utor. Are to sisi wo, ere nigin, are haiden ifenēdin. Idi foti-tu ogō bun taun fateul anī lai difalauf.

³ Age dife di, aya neu od megeir fiya nē isennēya tamo uru megeir afenēdi di, idi 1,260 naa anidi bun wau gudū fiya nē gabar difoun ken, profet od kurō difesiyouf.”

⁴ Eneidi are oliv aa uru ado lam tutur uru, tenebur nē Odug wagen difaref.

⁵ Takam idi darau ifenēdiya nigin age foug are, yā eweid bunem wō ye fen, idi neid kiwai tar oditekei yakur falauf. Aibem taka idi darau ifenēdiyou fenē age foug, are agef laa foug bagai.

⁶ Tamo eneidi saa katī feleya nē megeir ado nigin, idi profet od wogō douf sain, uyē to isiyouf, agef fen, idi naan falei fe di, naud wōya nigin megeir ado fen, ereb sain orodif kilei, idi ereb sane fire fire bunem teneub yūya nē megeir ado.

⁷ Idi Negur nē od kurō fesiya bure difele di, gaar kuī anī ku isil idīya sā bunem ulō yeis fen, idi geid kusī de, wal feid fen, idenkesiyouf.

⁸ Idi neid bouweid buru taun odug anī nē naabur yenēf, taun are yaab od bunem Sodom ado Isip dedig, an nedi Odugeg aa tetek bun dukesin.

⁹ Tamo kayau fire fire bun tamal, ibor fire fire bun tamal, od fire fire bun tamal ado, teneub fire

fire bun tamal, tamo kayau idi, naa towo ado naa taka atun bun, nedi bouweid buru dile fen, mumã difouf nigin to yo douf.

¹⁰ Tamo kayau tenebur dibodok anidi, idi nigin waud al fe di, sifa dino fen, idi abob safina ege luwa difenēf, ere nigin, profet uru eneidi, idi tenebur dibodok anidi darau difenēdin.

¹¹ Anĩ ere, naa towo ado naa taka atun anĩ bure fele di, mata neseya nē uur Negur bunem idi namedin ilen, age fe di, idi fafã de difaren. Age dife di, idi diledin are kumĩ tererē den.

¹² Anĩ bure fele di, idi saa ilunem ait odug eig ye irokeneĩd mog, karĩ den, “Ilun ein useg,” yen. Age ye di, idi neid kiwai lo difeid mog, idi lalo bunem saa ilun diselen.

¹³ Sain anĩ bun bagai, mimĩ odug wõ ye di, taun anĩ bun ten tekelei adok daũ felen. Sewen tausen tamo kayau mimĩ anim idenkesin. Age fe di, idi gareya sã are kumĩ tererē de fen, saa ilun nē Negur fula fiya medeĩya difenen.

¹⁴ Morõ odug uyu ilen anĩ dõ fiya bure fele di, morõ odug anĩ dõ fiya mogo melsã bagai isiyou fenē.

Engel Taur Namba Sewen Anĩ Wese Fen

¹⁵ Engel namba sewen anĩ yogon taur wese fe di, saa ilun ait odug wowã ye fen, diron:

“Tenebur nē tano are, neda Odug ado yogon
Kristus nē tano wõ yen,
age fe di, ĩ gai gai lo fiya nigin anĩ nē mudur
ibodõf.”

¹⁶ Age de di, tuwenti-fo mudur adodo, Negur wagen dogo neid king nē sia bun dibodon wageidlē kuku de fen, Negur yana dales,

17 **diron:**

“Odug Negur saa ilun nē kusī tamo guri weid uyu
 uroudig anī,
 ō gama ubodok, kulu ubodon, amā ō de
 mayok,
 ere nigin, ō ogon megeir odug wale fen,
 lo fiya nigin king wō won.

18 Teneub ganan waud sanen, anī ere, ogon didi
 mogo isin.

Tamo gare den anī es fediya sain mogo isin,
 ogon ferfer profet, ogon tamo kayau fateul
 ado,
 idi ogon yanā nigin anini den anidi nanaal ado
 odudug,
 mala solo ifenēdiya sain mogo isin,
 idi teneub daū difef anidi daū fediya sain mogo
 isin.”

19 Anī bure fele di, Negur nē tempel saa ilun kā
 fele di, yogon tempel namen yogon bar itenēya
 nē bogis wō yen. Age fe di, kolimei filiya, gurūya
 odug, kolimei gudūya, mimī ado, uyē ais ado odug
 wō yen.

12

Kayau Ado Gogour Odug

1 Uris odug fire bagai saa ilun wō yen. Kayau
 taka gaa ifoun kel fen, yogon ye farumen ogolam
 ado, yogon mudur bun barisa tuwelf nē teter
 kurū fen.

2 Ī bou ado fen, kesu gō fiya sain melsā di, darau
 nigin kāi yen.

3 Age fe di, uris takag saa ilun wō yen. Gogour
 giriya odug bagai mudur sewen, karat ten ado,

teter sewen mudur sewen bun difaren ado wō yen.

⁴Yogon ibum barisa fara fiya towo anī taka saa ilun waif, tenebur iraran. Gogour odug anī kayau kesu gō fiya sain melsā anī wagen ifaren, are ī yogon kesu gō falaisi di, itobouf nigin age fen.

⁵Kayau kesu taka gō fen, are kesu monog, ī teneub ganan ain manig nem ulum iro-kenēdiyof. Age fe di, yogon kesu kaisā bagai gurar fe yale, Negur ado yogon king nē sia wagen irouselen.

⁶Kayau, Negurem modoū dodok fenen nē gerere tuan iya ilen, an ī Negurem 1,260 naa kulatun fiyēf.

⁷Agef fen, saa ilun kusī wō yen. Maikel yogon engel geid, gogour odug geid kusī den. Age fe di, gogour odug, yogon engel geid, abag idi geid kusī den.

⁸Anī ere, gogour odug in engel geid, idi neid megeir kisi feleya sã, anī nigin, idi saa ilun nedi modoū ditoron.

⁹Gogour odug bagai are dale diran, are gogour kulu tamal bagai, anī Devil be, Satan dedig, ī teneub ganan idegnēdidig. Ī tenebur dale dira ken, yogon engeleg Ī geid diraran.

¹⁰Age fe di, aya saa ilunem ait odug eig ye mog, karī aun:

“Gama neda Negur nē kel yaleya, megeir, tano
ado,
yogon Kristus nē total mogo isin.

Ere nigin, Ī neda turada tar bouweid yūya od
irōdig,

ĩ neda Negur wagen, gaa ado bõ, idi bouweid
yũya od irõdig,
are mogo dale diran.

¹¹ Idi Sipsip Naal naud bunem ado,
dogo neid Jesus nigin od wogõya bunem
ĩ wal difiyen.

Idi dogo mata ibodõya nigin kisi fatuk to dale fen,
laa uyu ditoron.

¹² Anĩ nigin, saa ilun õ ado,
an ufaregef ã, wauĩ kulĩ ye!

Anĩ ere, teneub ado maaĩ ã, meleĩlon ado,
ere nigin, Satan mogo ã bun isilen!

Seye ĩ bun isokosef,
ere nigin, ĩ keleĩ, yogon sain mogo modegef.”

¹³ Sain gogour odug ĩ tenebur diran anĩ ile fen,
ĩ kayau kesu monog gõ fen anĩ iruf ilen.

¹⁴ Kayau are, gerere tuan modoũ ĩ nigin dodok
fenen anĩ bun fatutu ye ilauf nigin, webi odug nẽ
waye uru difenen, an kayau gogour odug anim to
irounẽf nigin, yar towo ado yar taka atun, kayau
anĩ kulatun difiyẽf.

¹⁵ Age fe di, gogour ĩ awa kurenem, naan odug
gen, naan foula fen, are kayau anĩ wal fiye ken,
kuwei bun yale irusilauf nigin age fen.

¹⁶ Anĩ ere, teneub kayau isenne ken, awa aã ye
fen, gogour odug awa kurenem naan odug foula
fen anĩ yakasin.

¹⁷ Age fe di, gogour odug kayau nigin fatuk
bagai name fen, kayau nẽ ibor tar fau dibodok
anidi ganan geid kusĩya nigin ilen, idi Negur nẽ
ĩtãfiya dõ de fen, Jesus nẽ biya od dirouf anidi.

13

¹ Agef fen, gogour odug maaĩ yerin ifaren.

Gaar Kuĩ Maaĩ Namenem Ulō Yesin

Age fe di, aya gaar kuĩ taka maaĩ namenem ulō yeis mog, ailen. Ī karat ten ado, mudur sewen ado fen, ĩ yogon karat ten bun teter adodo fen, mudur ganan bun Negur kono fiya nē yana ado.

² Gaar kuĩ aya ailen are lepat* gen, anĩ ere, yogon ye are bea nē ye gegen, agef fen, awa laion nē gen. Gogour odug yogon megeir, yogon king nē sia ado, totoo odug, gaar kuĩ ifenen. ³ Gaar kuĩ nē mudur taka are dũ di, laa fou fenē gen yenen, anĩ ere, dũ di, laa fou fenē gen yenen are baban biya len. Teneub ganan terē de fen, gaar kuĩ dō difen.

⁴ Tamo idi gogour odug yana dalesen, ere nigin, ĩ gaar kuĩ megeir ifenen. Age de fen, idi gaar kuĩg yana dales fen, diron, “Aim anĩ gaar kuĩ gen? Aim anĩ ĩ ado kusĩ yalesauf?”

⁵ Gaar kuĩ ĩ, yogo seli kulō fiya nē od ado Negur nigin kono fiya nē od wogō youf nigin sigor ifen ken, foti-tu ogō bun kabĩ yalouf nigin megeir ifenen.

⁶ Gaar kuĩ ĩ Negur kono fiyēf nigin, Negur yana, Negur nē ibodōya modoũ ado, idi saa ilun dibodok anidi bun bou yūya od wogō youf nigin awa kamen.

⁷ Gaar kuĩ ĩ, Negur nē tamo kayau geid kusĩ de fen, idi wal fediyouf nigin megeir ifenen. Agef fen, ĩ, ibor ganan, tamo kayau ganan, od fire fire

* **13:2:** Lepat are fus kuĩ odug gen.

ganan ado, teneub ganan nē mudur ibodōf nigin megeir ifenen.

⁸ Tenebur dibodok anidi ganan gaar kuī yana dalesauf, are idi, saa teneub ado kare fen sain bunem isi sain enei bun, idi yeneid Sipsip Naal dukessin anī nē mata ibodōya nē buk bun to itoton anidim age difouf.

⁹ Taka ī weder adouf, utornēg len, ī karī youf.

¹⁰ Taka ī kalabus bun ileyā nigin igirnēf, ī kalabus bun ilauf.

Taka ī dimig nem dukesiyouf nigin igirnēf, dimig nem ī dukesiyouf.

Enei wō youf sain bun, Negur nē tamo kayau feseya sã total difar fen, momoiya kafī difel dirouwauf.

Gaar Kuī Teneb Bunem Ulō Yesen

¹¹ Anī bure fele di, gaar kuī taka teneburem ulō yeis mog, ailen. Ī sipsip naal gen karat uru ado, anī ere, ī gogour odug gen wogō yedig.

¹² Ī gaar kuī uyulil ulō yesin anī lof mog, yogon megeir ganan yale fen, kabī yalen. Agef fen, ī, teneub ado idi tenebur difaref anidi ganan, gaar kuī uyulil ulō yesin, are dū di, laa fou fenē gen yenen anī baban biya len, ī yana dalesauf nigin nugo fedin.

¹³ Agef fen, ī uris memelik odug inodin, ī tamo kayau lo de mog, age fe di, yā saa ilunem tenebur isin anīg age fen.

¹⁴ Ī gaar kuī uyulil ulō yesin anī lof mog, megeir yale fen, memelik inodin nigin, ī tenebur difaref anidi idegnēdin. Ī, gaar kuī, are dimig nem dū di,

baban biya len anĩ yana dalesauf nigin, idi anĩ nē malakanon dinouf nigin irokenēdin.

¹⁵ Ī gaar kuĩ uyulil ulō yesin anĩ malakanon mata ifenēya nē megeir ifenen, anĩ bunem, malakanon are sã wogō yen, ĩ age fe di, idi malakanon anĩ yana yaleseya ditoron anidi ganan didenkesin.

¹⁶ Gaar kuĩ dumen ulō yesin are, tamo kayau ganan, nanaal ado odudug, safina ado ado maleg, kafĩ fiya sã tamo ado ferfer, uris taka imeid biyalē be, demeid bun dalouf nigin nugo fedin.

¹⁷ Age fe di, aibem taka to na yale fen, to na sur fouf, ĩ gaar kuĩ nē uris adouf anĩ dogol, uris are gaar kuĩ nē yana be, yogo yana nē namba.

¹⁸ Kisi biya adouf are, enei keleĩ youf. Are taka ĩ kariya biya adouf, ĩ utornēg len, gaar kuĩ nē namba iwesauf, ere nigin, namba are tamo nē. In namba are 666.

14

Sipsip Naal Ado 144,000 Tamo

¹ Anĩ bure fele di, aya lo afen, aya wageun Sipsip Naal Saion Arei bun 144,000, yogon yana ado yogon tama nē yana demeid bun itotoyan anidi, ĩ geid difaren.

² Age afe fen, aya ait taka saa ilunem, naan fatuk wĩ ye fen, gou redig gen ado, kolimei gudūya odug gen karĩ aun. Ait aya karĩ aun are, harp kodēya tamo harp kodē dedig gen.

³ Age de fen, idi, king nē sia, erab mata ibodōya aiwa adodo ado, mudur adodo wagedin seg mata dalen. Aibem taka seg anĩ keleĩa kisi feleya sã,

144,000 idi tenebur tamal kel gei fedin anidim dogol.

⁴ Eneidi are kayau geid yen ken, amuyē inoya sã anidi, ere nigin, idi dogo nigin karētut bagai dibodon. Idi Sipsip Naal narib ile di, idi dō de diyōdig. Idi tamo ganan atun kel geif fen, faat uyulil yūya gen, Negur ado Sipsip Naal bun sesewi fedin.

⁵ Idi sigoredin idegēya taka to wō yen, idi bouweid bun od taka sã.

Engel Towo

⁶ Anī bure fele di, aya engel taka ilun bagai fatutu ye mog, ailen. Ī idi tenebur dibodok anidi, are teneub ganan, ibor ganan, od fire fire ganan ado, tamo kayau ganan bun kurō fesiyouf nigin, mata ibodkeleya nē biya od ado ailen.

⁷ Ī ait odugem iron, “Negur anini wiyēg fen, ĩ fula fiya medeīya wenēg, ere nigin, yogon es fiya nē sain mogo isin. Ī saa, teneub, maaī ado, naan warur inodin anī yana waleseg.”

⁸ Anī dō fiya engel takam dō fiye ken, iron, “Ī kubū yen! Babilon Odug kubū yen, ĩ teneub ganan yogon seseirã tobonunã nē wain total ifeneīd don.”

⁹ Anī dō fiya engel takam dō fiyeīd fen, ait odugem iron, “Taka ĩ gaar kuī ado yogon malakanon yana yales fen, yogon uris dama bun be, ima bun yalouf,

¹⁰ ĩg Negur nē didi nē wain yāf, are mogo total adok yogon didi nē kap bun fi felen. Ī engel fateul anidi ado Sipsip Naal meleid bun, salfa yã bobo reya bun darau yalouf.

¹¹ Age fe di, dogo neid darau nē yākaau fā ye, gai gai agef ibodkalauf. Idi gaar kuī ado yogon malakanon yana dalesedig anidi be, aib taka yogon yana nē uris yalen ī, naa be bō, si inoya nē sain sā.”

¹² Enei wō youf sain bun, Negur nē tamo kayau, idi Negur nē itāfiya dō de fen, Jesus nigin moiya dirou kafī difelef anidi, feseya sā megeir difarauf bagai.

¹³ Anī bure fele di, aya saa ilunem ait taka eig ye mog, karī aun, “Utot: Idi sain enei bunem ilauf ganan, Odug bun gare douf are el fediyouf.”

Awa Uurem irok, “Mmoi, idi dogo neid kabī bun si dinouf, ere nigin, idi ereb age difen are ado dilauf.”

Tenebur Saaf Kusu Fiya Sain

¹⁴ Aya lo afen, aya wageun lalo lalau taka ado, lalo bun ibodon are ‘tamo naal gen,*’ ī yogon mudur bun gol teter kurū fen, yogon ima bun dimig gunō waila ado irouf anī ailen.

¹⁵ Age fe di, engel taka tempel bunem isi fen, ī lalo bun ibodon anī ait odugem iweig irokenen, “Ogon dimig gunō waila ado wale fen, kokour wo, ere nigin, kokour fiya nē sain mogo isin, tenebur saaf kusu fiya nē are mogo mayol.”

¹⁶ Age ye di, lalo bun ibodon ī, yogon dimig gunō waila ado tenebur wāī fe di, tenebur saaf kokour fen.

¹⁷ Engel taka, saa ilun oun tempel bunem isin, īg dimig gunō waila ado iron.

* **14:14:** Daniel 7:13

18 Age fe di, engel takag, yã lo fedig anĩ alta bunem isi fen, ait odugem ã dimig gunõ waila ado iron anĩ iweig irokenen, “Ogon dimig gunõ waila ado wale fen, tenebur tamal wain nẽ biya kuru wo, ere nigin, wain biya are mayol.” 19 Engel ã yogon dimig gunõ waila ado anĩ tenebur waif fen, wain biya kuru fen, agef fen, ã Negur nẽ didi nẽ wain asi fiya modoũ odug bun iraran.

20 Wain biya are, taun yerin wain asi fiya modoũ bun asi difen, age dife di, naud wain asi fiya modoũ bunem isin, are 300 kilomita meluk fen, wan ado hap mita ilun.

15

Engel Sewen Teneub Daũ Fiya Nẽ Sesen Sewen Adodo

1 Anĩ bure fele di, aya saa ilun uris odug taka fire bagai ailen. Are engel sewen, idikeleya nẽ teneub daũ fiya nẽ sesen sewen adodo, are idi idikeleya nẽ, ere nigin, idi bunem Negur nẽ didi idikalauf.

2 Age afe fen, aya ereb taka maaĩ galas nem dinon anĩ, yã ado bagu fiya gen ail fen, idi gaar kuĩ, yogon malakanon ado, yogon yana nẽ namba kusĩ bun wal difen anidi, maaĩ yerin difaren anĩ ailen. Idi Negurem harp ifenēdin anĩ guri de fen,

3 Negur nẽ ferfer, Moses nẽ seg ado, Sipsip Naal nẽ seg dalen:

“Odug Negur saa ilun nẽ kusĩ tamo guri weid uyu uroudig anĩ,
 õ agodig anĩ odug fen, mala yũ yaleya.
 Teneub ganan nẽ King,

ogon naab are madur fen, momoi bagai.

⁴ O Odug, aim anī ō to kumī yo ken,
ō yanā bun fula fiya medeīya to inouf?
Ere nigin, ō dogol fateul.

Ogon tobonunā biya madur bagai are yaor won
nigin,
teneub ganan disi fen,
ō wagen yanā dalesauf.”

⁵ Anī bure fele di, aya lo afe mog, saa ilun
oun tempel, Negur nē Od Kurō Fesiya nē Salafat
Fateul, are kā fen.

⁶ Tempel namenem, engel sewen idi teneub daū
fiya nē sesen sewen adodo anī ulō desain. Idi kolos
lalau amuyē sã, medeīya difoun ken, idi akoreid
bun gol let gu difedin.

⁷ Age dife di, ereb mata ibodōya aiwa adodo
takam, gol beī sewen Negur mata faimud ibodke-
leya nē didi isokoseya anī, engel sewen ifenēdin.

⁸ Age fe di, tempel are, Negur nē fula fiya
medeīya ado yogon megeir nē kaau isokose di,
engel sewen neid teneub daū fiya nē sesen sewen
anī fau bure feleya sã mog, taka nem tempel
namen ileya kisi feleya sã.

16

Beī Sewen Negur Nē Didi Ado

¹ Anī bure fele di, aya ait odug taka tempel
bunem engel sewen irokeneīd fen, eig ye mog,
karī aun, “Uleg, beī sewen Negur nē didi adodo
anidi teneub bun fi weleg.”

² Engel uyulil ile fen, yogon beī teneub bun fi
fele di, guruma sane darau odug bagai anī, tamo

kayau gaar kuĩ nē uris ado fen, yogon malakanon yana dalesedig anidi bun, wowã yen.

³ Anĩ dō fiya engel taka, yogon beĩ maaĩ bun fi fele di, maaĩ anĩ laa tamo nē naud gen falei fen, age fe di, ereb ereb maaĩwō mata dibodon ganan gare den.

⁴ Anĩ dō fiya engel taka, yogon beĩ, naan odudug ado naan warur anidi bun fi felen, age fe di, naud falei feledin.

⁵ Age fe di, aya engel naan lo fedig anĩ eig ye mog, karĩ aun:

“Ō gama ubodok, kulu ubodon, ō Fateul Bagai,
 ō madur bagai,
 ere nigin, ō mogo ago es won.

⁶ Idi ogon tamo kayau ado ogon profet didenkeis fen, dogo neid naud fi difelen,
 anĩ nigin, ō idi naud yōya nigin wenēdin, are idi yōya kisin bagai wenēdin.”

⁷ Age ye di, aya alta eig ye mog, karĩ aun:

“Momoi, Odug Negur saa ilun nē kusĩ tamo guri weid uyu uroudig anĩ,
 ogon es fiya are, momoi fen madur bagai.”

⁸ Anĩ dō fiya engel taka, yogon beĩ gaa bun fi fele di, gaa tamo kayau yã nem ifalegnēdiyof nigin megeir ifenen.

⁹ Idi uruwa total bagai bunem ifalegnēdi di, idi, Negur teneub daũ fiya nē sesen eneidi lo fedidig anĩ, yana kono difen, age de fen, idi waud falei ye fen, Negur yana yaleseya ditoron.

¹⁰ Anĩ dō fiya engel taka, yogon beĩ gaar kuĩ nē king nē sia bun fi fele di, yogon tano gugum kelen. Tamo idi darau nigin baleid mũ de fen,

11 dogo neid darau ado gurumeid nigin, saa ilun nē Negur kono difen. Anī ere, idi ereb sane age difen anī to ditor ken, waud to falei yen.

12 Anī dō fiya engel taka, yogon beī Yufretis naan odug bun fi fele di, naan are, gaa iseyan tamal king disiyouf nē naab dodok fiya nigin, gere kelen.

13 Anī bure fele di, aya kaa sesen towo felī gen, idi gogour odug awa kurem, gaar kuī awa kurem ado, idegēya profet awa kurem ulō deis mog, ailen.

14 Idi kaa sesen nē uur anidim memelik nē uris dino fen, idi teneub ganan nē king ganan bun dile fen, Negur saa ilun nē kusī tamo guri feid uyu iroudig anī nē naa odug bun, idi kusī bun guru difouf nigin gou difediyouf.

15 Jesus irok, “Lo welegei, aya bē tamo gen asiyouf! Taka ī mulaī yenēya sa ken, yogon kolos sirin ado ibodok are, ī el fiyek, ere nigin, ī gemū to ile di, yogon mama to dilouf.”

16 Age de fen, idi king, Hibru od nem Amagedon dedig nē an guru difouf nigin gou difedin.

17 Anī dō fiya engel taka, yogon beī ilun owōbē fi fele di, tempel namenem king nē sia bunem ait odug wō ye fen, iron, “Gama mogo bure felef!”

18 Age fe di, kolimei filiya, gurūya odug, kolimei gudūya ado, mimī odug wō yen. Tamo tenebur difar mog, mimī odug age fiya taka to wō yen, mimī are gai odug bagai.

19 Taun odug Babilon are faraf towo fen, agef fen, teneub ganan nē taun daū feledin. Negur ī

Babilon Odug nigin weder fokōf fen, kap yogon didi barikā nē wain isokosen anī ifenen.

²⁰ Nuyo ganān sa kele di, areig ilediya kisi feleya sã.

²¹ Saa ilunem uyē ais ado odug, teke tekelei 50 kilogram age fiya tamo bun kuku ren. Age fe di, idi uyē ais adom daū fedin nigin de fen, Negur kono difen, ere nigin, daū fiya are, gai sane bagai.

17

Kayau Gaar Kuī Teten Ibodon

¹ Engel sewen beī sewen adodo anī takam isi fen, aya irokanan, “Usi, aya kayau bouwa na sur fedig odug, ī naan musei teten ibodōdig anī nē kafī fiya afelnōf.

² Tenebur nē king, ī geid seseirā tobonunã dino di, tamo kayau tenebur difaref anidi, yogon seseirā tobonunã nē wain bunem, idi meleid waī yen.”

³ Age ye fen, engel ī Awa Uur bunem aya gerere tuan yale irouleyan. An aya, kayau, gaar kuī giriya, bouwa bun kono fiya yeneid barikā, mudur sewen ado, karat ten anī teten ibod mog, ailen.

⁴ Kayau ī, kolos giriya tu releya medeīya ado giriya bagai ifoun ken, gol, meein meli bagai ado, maaī tuwa meli bagai pel naki yen. Ī gol kap, ninir safineid ado yogon seseirā tobonunã nē sisik isokosen anī imam iron.

⁵ Waa nē yana are, yogon dama bun ditoton:

BABILON ODUG
KAYAU BOUWEID NA SUR FIYA ADO
TENEBUR NINIR IBODOK ANIDI NEID SINA.

⁶ Aya, kayau, Negur nē tamo kayau neid naudeid ado, idi Jesus nē od kurō difesin anidi, nedi naudeid yokon, mala waī ye mog, ailen.

Aya kayau anī ail fen, fatuk bagai terē aun.

⁷ Age afe di, engel aya irokanan, “Ō ere nigin terē wof? Aya, ō, kayau nē waa ado, gaar kuī kayau anī teten ibodōdig, ī mudur sewen ado fen, karat ten ado anī nē waa anī faded ayōf.

⁸ Gaar kuī ulen are, kulu ibodon, gama ibodōya sã, agef fen, ī ku isil idīya sã bunem ulō yeis fen, yogo daū falauf bun ilauf. Tamo kayau tenebur dibodok anidi, saa teneub ado kare fen sain bunem isin, idi yeneid mata ibodōya nē buk bun to itoton, idi gaar kuī anī dile fen terē douf, ere nigin, gaar kuī ī kulu ibodon, gama ibodōya sã, agef fen, fau dum isiyouf.

⁹ “Enei keleīya nigin, kisi biya adouf. Mudur sewen are, arei mudu sewen kayau teten ibodōdig anī.

¹⁰ Idig king sewen anidi. Faif idi kuku ralaisin, taka fau ibodok, taka fau isiya sã. Anī ere, ī isiyouf are, sain naal bagai ibodōf.

¹¹ Gaar kuī kulu ibodon, gama ibodōya sã, are ī namba eit king, ī sewen anidi nē taka, ī yogo daū fiya bun ilauf.

¹² “Karat ten ō ulen are, ten king idi tano fau yaleya sã anidi, anī ere, idi gaar kuī geid, aua tekelei king nē megeir dalouf.

¹³ Idi kisi tekelei ado fen, dogo neid megeir ado totol, gaar kuī difenēf.

¹⁴ Idi Sipsip Naal geid kusī douf, anī ere, Sipsip Naal idi kusī bun wal fediyouf, ere nigin, ī odug

neid Odug ado king neid King. Idi ï iweignēdin anī, igirnēdin anī, feseya sā dō difen anidi, ï geid difarauf.”

¹⁵ Age ye fen, engel aya irokanan, “Naan, kayau bouwa na sur fedig ï anī teten ibodon, ō ulen are, tamo kayau, guru fiya odug, teneub ganan ado, od fire fire ganan.

¹⁶ Karat ten ō ulen ado gaar kuī, idi kayau bouwa na sur fedig anī to orodiyouf. Idi ï daū difiye ken, gemū dinenēf. Idi ï bouwa dokon, yā nem tō difiyēf.

¹⁷ Negur idi neid waud bun kisi anī ino di, idi Negur nē oroya dō difouf nigin, idi kisi tekelei dino fen, dogo neid tano gaar kuī difenēf, age difef dile mog, Negur nē od kisi falauf.

¹⁸ Kayau ō ulen are, taun odug, tenebur nē king neid mudur ibodok anī.”

18

Babilon Narī Fen

¹ Anī bure fele di, aya engel taka saa ilunem isi mog, ailen. ï megeir odug ado, age fe di, yogon fula fiya medeīya anim teneub lalan len.

² ï ait odugem, total bagai iweig iron:
“Kubū yen! Babilon Odug kubū yen!

ï, kaa sesen neid fō,
kaa sesen ganan neid fō ado,
ninā amuyē ado ninir sane to ile oroya ganan
neid fō falei fen.

³ Teneub ganan,
yogon seseirā tobonunā nē wain total don.
Tenebur nē king, ï geid seseirā tobonunā dinon,

age fe di, tenebur nē bisnis tamo idi, yogon safina nigin oroya total ado bunem, safina musei dalen.”

⁴ Anī bure fele di, aya ait taka saa ilunem eig ye mog, karī aun:

“Neu tamo kayau, ā yogon mosor anī utin to walogouf nigin ado,
ā in mala solo sane taka to walogouf nigin,
ā ī utornēg fen, usig,

⁵ ere nigin, yogon mosor mogo mudu ilun isel saa ilune di,

Negur yogon idododin nigin weder fokō yen.

⁶ Ī ifenein kilei abag wenēgouf,

ereb ī age fen are, ī age fen anī ado, taka teten unog fen, wenēgouf.

Ereb ī yogon kap bun falei fen are, ī falei fen anī ado, taka falei ge fen, teten unogouf.

⁷ Ī fula fiya medeīya ado safina meli meli, yogo nigin yalen kilei,

darau ado wau gudū fiya fatuk bagai wenēgouf.

Ī yogon wau bun, yogo yana yales fen,

‘Aya kuin abodok, aya waab sā,
agef fen, aya to bagai wau gudū fouf,’ yen.

⁸ Anī nigin, naa taka bun, in daū fiyēya nē sesen ī bun isiyouf,

are laa, wau gudū fiya ado, kadir.

Agef fen, ī yā bun isaikalauf,

ere nigin, Odug Negur ī es fiyek, ī anī megeir barikā.

⁹ “Tenebur nē king idi, ī geid seseirā tobonunā dino fen, yogon safina meli meli foi difen anidi, ī

isaĩ di, kaau dile fen, idi ĩ nigin waud gudũf fen, inã logurouf.

¹⁰ Idi in darau yaleya anĩ nigin fatuk bagai kumĩ de fen, gerõ difar fen, dirõf:

“ ‘Malalon! Malalon, O taun odug,

O Babilon, taun megeir ado!

Aua tekelei bun, ogon daũ fiya mogo isin!’

¹¹ “Tenebur nẽ bisnis tamo idi ĩ nigin waud gudũf fen, inã logurouf, ere nigin, taka nem idi neid safina baban to na yalouf,

¹² safina are, gol, silwa, meein meli meli ado, maaĩ tuwa meli bagai pel; gabar lalau medeĩya, gabar giriya tu releya medeĩya, gabar slika ado, gabar giriya bagai; aa meli meli fire fire; ererb ererb fire fire elefan karat nem, aa meli meli nem, bras nem, ain nem ado, mambol nem dinodin;

¹³ sinamon, ye, aa gaula sumeĩ nigin tõ fiyadig, moul aa bun tamal sumeĩ biya biya ado, moul biya takag; wain ado oliv moul; flawa ado wit, bulmakau ado sipsip; hos ado karis, ferfer ado tamo mata dibodok.

¹⁴ “Idi dirõf, ‘Ereb ererb yaleya nigin õ oroyon are, mogo sa kelen. Ogon safina musei ado ererb ererb fula fiya medeĩya ganan, mogo sa kelen, idi baban to bagai fotou difouf.’

¹⁵ Bisnis tamo safina eneidi na sur dife fen, ĩ bunem safina musei dalen anidi, yogon darau nigin fatuk bagai kumĩ de fen, gerõ difarauf. Idi inã logur fen, waud gudũf fen,

¹⁶ diweig dirõf:

“ ‘Malalon! Malalon, O taun odug,

kolos lalau meli bagai, giriya tu releya medeĩya ado, giriya bagai ifoun ken,

gol, meein meli bagai ado, maaĩ tuwa meli
bagai pel naki yen!

17 Aua tekelei bun dogol, safina odug bagai age
fiya daũ felen!’

“Maaĩ bun ulum irouya tamo ganan, idi waag
bun diyōdig ganan ado, idi maaĩ bunem dogo neid
mata ibodōya nē safina daledig anidi ganan, gerō
bagai difarauf.

18 Sain idi ĩ isaĩ di, kaau dile fen, idi diweig
dirōf, ‘Taun odug eig fiya taka tau ibodon?’

19 Idi aas mudureid bun digu ken, waud gudū
fe di, inā logur fen, diweig dirōf:

“ ‘Malalon! Malalon, O taun odug,
an idi maaĩ bun waag adon ganan,
yogon safina odug bunem safina musei
dalen!

Aua tekelei bun, are daũ felen!

20 O saa ilun, ĩ nigin waũ kulĩ ye!

Negur nē tamo kayau, aposel ado, profet,
wauĩ kulīg!

Ī ã age yein kilei, Negur ĩ es fiyen.’ ”

21 Age ye fen, engel megeir ado, meein odug wit
itutuya nē age fiya, yale fen, maaĩwō ira ken, iron:

“Waila sane eig fiya bunem,
Babilon taun odug agef daũ fe di,
baban to bagai dilouf.

22 Harp kodēya tamo, seg tamo, kelel fīya tamo
ado, taur fūya tamo,

idi neid ailō ō bun baban to bagai karĩ douf.

Kabĩ fire fire ganan nē keleĩ tamo,

ō bun baban taka to bagai wō youf.

Wit itutuya nē meein ait,

ō bun baban to bagai karĩ douf.

²³ Lam nē lalan ō bun baban to bagai so fouf.

Tamo kayau yalef yalef yeya ait,
ō bun baban to bagai wō youf.

Ogon bisnis tamo idi, teneub ganan nē tamo odug.

Ō ogon idegēya kosē bunem, teneub ganan
udegnēdin.

²⁴ Profet, Negur nē tamo kayau ado,
tenebur ein didenkesin anidi ganan neid
naudeid, ĩ bun dilen.”

19

Halleluya!

¹ Anĩ bure fele di, aya saa ilun tamo kayau guru
fiya mala odug neid aiteid gou reya gen, karĩ aun:
“Halleluya!

Kel gei fiya, fula fiya medeīya ado, megeir are,
neda Negur nē.

² Yogon es fiya are, momoi fen madur bagai.

Ĩ kayau bouwa na sur fedig odug,
ĩ yogon seseirã tobonunã bunem teneub daũ
fen anĩ, es fiyen.

Ĩ yogon ferfer neid naudeid, anĩ mala solo ĩ bun
ifenen.”

³ Idi baban diweig diron:

“Halleluya!

Ĩ bunem kaau faimud gai gai iselauf.”

⁴ Mudur adodo tuwenti-fo ado, ereb mata
ibodōya aiwa adodo, kuku de fen, Negur king nē
sia bun ibodon anĩ yana dalesen. Age de fen, idi
diweig diron:

“Momoi, Halleluya!”

⁵ Age dife di, ait taka, king nē sia bunem wō ye fen, iron:

“Ā in ferfer ganan,
ī anini wiyēgedig,

nanaal ado odudug,

neda Negur yana waleseg!”

⁶ Age ye di, aya guru fiya mala odug aiteid gen karī aun, are naan fatuk wī ye fen, gou redig gen ado, kolimei gudūya odug gen, diweig dirō mog, karī aun:

“Halleluya!

Ere nigin, neda Odug Negur saa ilun nē kusī tamo guri feid uyu iroudig anī, ī lo fiya nigin king ibodok.

⁷ Ada wauda kulī ye, wauda al fe fen,
fula fiya medeīya tafenēf!

Ere nigin, Sipsip Naal kayau yaleya nē naa mogo isin,

age fe di, yogon kayau mois mogo yogo nigin dodok fen.

⁸ Kolos lalau meli bagai, medeīya ado filiya,
ī ifonūf nigin ifenen.”

(Kolos lalau meli bagai are, Negur nē tamo kayau neid tobonuneid madur anī.)

⁹ Anī bure fele di, engel aya irokanan, “Utot: ‘Idi Sipsip Naal kayau mois ado bagu fiya nē sifa bun ibodōya nigin iweignēdin are, idi el fedif!’ ” Age ye fen, ī tobol fe iron, “Enei are, Negur nē od momoi bagai.”

¹⁰ Age fe di, aya ī yana alesauf nigin, ye gariyan kubū aun. Anī ere, ī aya irokanan, “To ago! Aya, ō ado, ogon turā tar idi Jesus nē wogōya kafī difel dirouf anidi geid, ada in ferfer. Negur yana

wales! Ere nigin, Jesus nigin wogōya are, profet od wogōya nē uur anī.”

Tamo Hos Lalau Teten Ibodon

¹¹ Aya saa ilun kā feleya ifar mog, aya wageun an hos lalau ifar mog, ailen. Tamo anī teten ibodon are, yana ‘Feseya Sā Dō Fiya Biya’ ado ‘Momoi Bagai’ dedig. Madur bagai bunem, ī es feid fen, kusī yedig.

¹² Yogon mala are, yā mala fitotoleya gen, agef fen, yogon mudur bun teter musei biya. Ī yogo bun yana itotoya taka ado, are aibem taka to keleī, ī yogo dogol.

¹³ Ī kolos meluk naud bun nu fen anī ifonun. Yogon yana are, Negur nē Od.

¹⁴ Saa ilun nē kusī tamo, idi hos lalau tetedin dibodada ken, kolos meli bagai, lalau filiya difoun ken, ī dō difiyen.

¹⁵ Ī yogon awa bunem, dimig waila ado, teneub ganan yūf nigin wō yen. “Ī ain manig nem ulum iroukenēdiyof.”* Ī, Negur saa ilun nē kusī tamo guri feid uyu iroudig anī nē didi totol nē wain asi fiya modoū bun, asi fouf.

¹⁶ Ī, yogon kolos meluk bun ado yogon tukuri bun, yana enei itotoya ibodok:

KING NEID KING ADO ODUG NEID ODUG.

¹⁷ Age afe fen, aya engel taka gaa bun ifar mog, ailen, ī ait odugem ninā ganan ilun fatutu def anidi iweig irokenēdin, “Usig, Negur nē sifa odug bun gurug,

¹⁸ agog fen, ā, king bouweid, kusī mudur bouweid, tamo megeir adodo neid bouweid, hos

* 19:15: Sam 2:9

ado hos tetedin dibodadak anidi neid bouweid, tamo kayau ganan, kafī fiya sā tamo ado ferfer, nanaal ado odudug, bouweid wāgauf.”

¹⁹ Anī bure fele di, aya, gaar kuī, tenebur nē king ado, dogo neid kusī tamo idi, tamo hos teten ibodon anī, yogon kusī tamo geid weim kusī douf nigin, guru de mog, ailedin.

²⁰ Anī ere, gaar kuī are dale diroun, age de fen, idegēya profet, ī memelik nē uris gaar kuī mala bun inodin anīg, gaar kuī ado dale diroun. Uris anidi bunem, ī, idi gaar kuī nē uris dalen anidi ado, idi yogon malakanon yana dalesedig anidi idegnēdin. Idi urom mata dibod mog, ku kolili fiya meein salfa yā bobo reya barikā ado bun, gei de diraran.

²¹ Dogo neid kusī tamo ganan, dimig, tamo hos teten ibodon awa bunem wō yen anim, idenkesin, age fe di, ninā ganan idi neid bouweid dō dō, teid isokosen.

20

Tausen Yar

¹ Anī bure fele di, aya engel taka saa ilunem, ī ku isil idīya sā nē ki ado, sen odug imam irou fen, isi mog, ailen.

² Ī gogour odug, gogour kulu tamal bagai, are Devil be Satan dedig anī yale fen, tausen yar ifarauf nigin sen nem ifokelen.

³ Ī ku isil idīya sā bun ira ken, ku katī fel fen, anī teten itāfiya uris inon. Ī tenebur tamo kayau to idegneid mog, tausen yar ilauf nigin age fen. Anī bure fele di, sain tobega dogol ī folō fiyekalauf.

⁴ Aya, king nē sia anidi bun, idi es fiya nē megeir ifenēdin anidi dibod mog, ailedin. Age afe fen, aya, dogo neid biya od Jesus nigin wogō den ado, Negur nē od nigin, uleid kokour difedin anidi neid meleidkanon ailen. Idi gaar kuī be, yogon malakanon yana to dales fen, yogon uris demeid bun be, imeid bun to dalen. Idi mata ke de, fã de fen, Kristus geid, lo fiya nigin tausen yar ilauf anī nē mudur dibodon.

⁵ (Tamo gare den tunī ganan to ke de, fã de mog, tausen yar are bure felen.) Enei are, kel fãya uyulil anī.

⁶ Idi kel fãya uyulil anī bun ke de, fã den are, idi el feid fen, fateul. Laa uyulil anī dō fiya isif are, idi bun megeir sã. Anī ere, idi Negur nē ado Kristus nē pris dibod ken, tausen yar anī bun, Kristus geid, lo fiya nigin mudur dibodōf.

Satan Daū Felen

⁷ Tausen yar anī bure fele di, Satan ī yogon kalabus bun tamal yalelnē di,

⁸ Ī tamo kayau teneub ganan bun idegnēdiyof nigin, teneub idīyan aiwa adodo, are Gog ado Magog bun ile fen, idi kusī bun ilya nigin gou fediyof. Idi neid namba are, maaī ubun mumul ifaref age fiya.

⁹ Idi teneub modoū odug bun dile fen, Negur nē tamo kayau neid modoū ado, taun Negur anī nigin wau laa fedig anī salili difen. Anī ere, yã saa ilunem isi fen, idi yakur feidlen.

¹⁰ Age fe di, Satan idi idegnēdin are, ku kolili fiya meein salfa yã bobo reya ado bun dale diran, gaar kuī ado idegēya profet idi ketem mogo an

diraran. Idi ganan an sain ganan, bō ado gaa ado, gai gai darau dalouf.

Gare Den Anidi Es Fediyouf

¹¹ Anī bure fele di, aya king nē sia lalau odug ado, taka anī teten ibodon anī ailen. Teneub ado saa, ī mala iran nē waīf yale di, idi modoū san.

¹² Age fe di, aya, gare den anidi, odudug ado nanaal, sia wagen difaren ado, buk ikoudiya anidig ailedin. Buk takag ikouya ailen are, mata ibodōya nē buk. Gare den anidi, ereb age difen buk bun itoton anī kilei, es fedin.

¹³ Maaī bun gare den anidi, maaīm ifenēdi di, laa ado Hades, gare de di, idi bun difaren anidi difenēdin. Age fe di, mugu mugu ereb age difen kilei, es fedin.

¹⁴ Age fe di, laa ado Hades, ku kolili fiya yā bobo reya ado bun geif iraran. Ku kolili fiya yā bobo reya ado, are laa uyulil isin anī dō fiya laa anī.

¹⁵ Aib taka ī, yogon yana mata ibodōya nē buk bun itotoya sā ilen, ī ku kolili fiya yā bobo reya ado bun, yale iran.

21

Jerusalem Mata

¹ Anī bure fele di, aya, saa mata ado teneub mata, ailen. Saa uyulil ado teneub uyulil are waīf yalen, agef fen, maaī baban to ibodon.

² Aya Taun Fateul, are Jerusalem mata, Negur bun tamal, saa ilunem isi mog, ailen, are kayau mois tamon ileya nigin naki rel fen, dodok fen gen.

³ Age afe fen, aya ait odug king nē sia bunem eig ye mog, karī aun, “Gama Negur nē salafat, tamo bun ibodok, age fe di, ī idi geid dibodōf. Idi yogon tamo kayau ouf, age fe di, Negur yogo bagai, idi geid dibod ken, idi neid Negur ibodōf.

⁴ Ī idi neid meleid bun maruid ganan waī falauf. Baban laa, wau gudū fiya, inā yaleya be, darau to ibodōf, ere nigin, ereb ereb tubu nē are, ganan sa kelen.”

⁵ Ī king nē sia bun ibodon are iron, “Aya ereb ereb ganan mata anof!” Age ye fen, ī iron, “Enei utot, ere nigin, od eneidi are, agef bagai wō youf nigin momoi bagai.”

⁶ Ī aya irokanan, “Gama mogo bure felen. Aya uyulil ado idikeleya, gariya ado idikeleya. Taka ī naan ail fouf, aya ī mata ifenēya nē naan warur bun tamal, mala sā, afenē di, yāf.

⁷ Taka ī kusī wal fouf, ī enei ganan akorouf, age fe di, aya yogon Negure di, ī neu kesu ibodōf.

⁸ Anī ere, idi dume dume age difedig, momoiya sā, tobonunā sane bagai dinodig, tamo dukesidig, noli tobonunā dinodig, idegēya bun kosē dedig, idegēya waitou yana dalesedig ado, idegēya tamo ganan, idi neid modoū are, ku kolili fiya meein salfa yā bobo reya barikā ado bun. Enei are, laa uyulil dō fiya namba tu laa anī.”

⁹ Engel sewen anī taka, beī sewen idikeleya nē sesen barikā teneub daū fiya nē ado anī taka, isi fen, aya irokanan, “Usi, aya kayau mois, Sipsip Naal nē kayau anī afelnōf.”

¹⁰ Age ye fen, ī aya Awa Uur bunem arei odug ilun bagai anī bun irouleya fen, Taun Fateul,

Jerusalem, Negur bun tamal saa ilunem isi mog, ifelnan.

¹¹ Taun are, Negur nē fula fiya medeīya anim so fen. Yogon medeīya are, meein na sur fiya nē meli bagai jasper gen, yogon filiya are, galas medeīya bagai gen.

¹² Taun are, yogon garaī odug ilun fen, bobog tuwelf ado. Agef fen, engel tuwelf bobog bun difaren. Bobog bun, Israel ibor tuwelf anidi yeneid itoton.

¹³ Bobog towo gaa iseyan, bobog towo not melē, bobog towo saut melē, bobog towo gaa ileyan age de difaren.

¹⁴ Taun anī nē garaī, gariya tuwelf ado, gariya tuwelf anī bun, Sipsip Naal nē aposel tuwelf yeneid ado.

¹⁵ Engel aya wogō fiyan are, ī taun, taun nē bobog ado, yogon garaī sisi fediyouf nigin, sisi fiya nē gol tibog iron.

¹⁶ Taun nē bagalam ado bogorou kilei kilei inon. Engel are tibog nem taun sisi fe fen, ilen, 2,200 kilomita meluk, yogon bagalam ado yogon ilun areg de anī kilei.

¹⁷ Engel ī, tamo nē sisi fiya bunem, taun garaī nē mugī sisi fen, are 65 mita, areg engel nē sisi fiya.

¹⁸ Garaī are, meein jasper nem inon. Agef fen, taun are gol bagai nem dogol inon, gol filiya are galas medeīya bagai gen.

¹⁹ Taun garaī nē gariya are, meein meli bagai fire fire nem, naki fen. Gariya uyulil ifaren are jasper nem, anī dō fiya are meein maaī gegē gen sapaia nem, anī dō fiya are meein kalsedoni nem,

anĩ dō fiya are meein aarau mata gen emeral nem,

²⁰ anĩ dō fiya are meein giriya ado lalau sadonikis nem, anĩ dō fiya are meein giriya konilian nem, anĩ dō fiya are meein aarau mayo gen krisolait nem, anĩ dō fiya are meein aarau mata gen beril nem, anĩ dō fiya are meein aarau mayo gen topas nem, anĩ dō fiya are meein krispres nem, anĩ dō fiya are meein haiasin nem, anĩ dō fiya are meein giriya ametis nem.

²¹ Bobog tuwelf are maaĩ tuwa meli bagai pel tuwelf, bobog teke tekelei, maaĩ tuwa meli bagai pel teke tekelei nem inon. Taun nē naab odug are, galas karētut bagai gen, gol bagai nem dogol inon.

²² Aya taun an tempel taka to ailen, ere nigin, Odug Negur saa ilun nē kusĩ tamo guri feid uyu iroudig anĩ ado Sipsip Naal are, idi anĩ tempel.

²³ Taun are, gaa lalan be, ogō lalan yaleya nigin to yenek, ere nigin, Negur nē fula fiya medeĩya anim lalan ifenēdig, agef fen, Sipsip Naal are taun nē lam.

²⁴ Tenebur tamo kayau, taun anĩ nē lalan bun diyō di, tenebur nē king, nedi fula fiya medeĩya, taun anĩ bun dirousiyouf.

²⁵ Naa taka bun, yogon bobog taka to bagai inolalauf, ere nigin, an bō sãf.

²⁶ Tenebur tamo kayau idi, nedi fula fiya medeĩya ado yana odug, taun anĩ bun dirou disiyouf.

²⁷ Ereb taka amuyē ado an namen to ilauf, agef fen, aib taka mama nē tobonunã age fedig be, idegēdig, ĩg an to ilauf, anĩ ere, idi yeneid Sipsip

Naal nē mata ibodōya nē buk bun itoton anidi dogol dilauf.

22

Mata Ifenēya Nē Naan Odug

¹ Anī bure fele di, engel ĩ, aya, naan odug, mata ifenēya nē naan, are karētut galas medeīya bagai gen, Negur nē ado Sipsip Naal nē king nē sia bunem isif anī ifelnan,

² naan are taun nē naab odug atu isilen. Naan si sitakā, mata ifenēya nē aa difaren, are yar tekelei bun faat yū tuwelf fedig, ogō teke tekelei bun yogon faat yūdig. Agef fen, aa aarau are, tenebur tamo kayau dagi yalelkenēdiya nē.

³ Isisīya taka baban to ibodōf. Negur nē ado Sipsip Naal nē king nē sia are, taun namen ibodōf, age fe di, yogon ferfer idi, in aruna dalouf.

⁴ Idi in nawa dilouf, age dife di, yogon yana idi demeid bun ibodōf.

⁵ Baban bō taka to ibodōf. Idi lam nē lalan be, gaa nē lalan nigin, to kisi difouf, ere nigin, Odug Negur idi lalan ifenēdiyof. Age fe di, idi gai gai lo fiya nigin mudur dibodōf.

⁶ Engel ĩ aya irokanan, “Od eneidi are, agef bagai wō youf nigin momoi bagai. Odug, profet neid uur nē Negur, ĩ ereb mogo wō youf bagai anī yogon ferfer ifelnēdiyof nigin, yogon engel sur fen.”

Jesus Mogo Isif

⁷ “Ulef! Aya mogo kaisā bagai asiyof fenē! Taka ĩ profet od buk enei bun ibodok anī dō fef are, ĩ el fiyek.”

⁸ Aya, Jon, ayam eneidi karĩ au fen, ailedin. Sain aya anĩ karĩ au fen, ailedin, aya engel aya ifelnan anĩ, ye gariyan kubũ au fen, yana alesauf nigin age afen.

⁹ Anĩ ere, ĩ aya irokanan, “To ago! Aya, õ, ogon turã tar profet ado, idi buk enei nẽ od dõ difef anidi ganan geid, ada in ferfer. Negur yana wales!”

¹⁰ Age ye fen, ĩ aya irokanan, “Õ buk enei nẽ profet od anĩ bun, ĩtãfiya uris to uno, ere nigin, sain mogo melsak.

¹¹ Aib ĩ mosor inof, utornẽg len, ĩ agef mosorei youf. Aib ĩ sane age fef, utornẽg len, ĩ sane agei foug. Aib ĩ biya age fef, utornẽg len, ĩ biya agei foug. Aib ĩ fateul ibodok, utornẽg len, ĩ fateulei youf.”

¹² Jesus irok, “Ulef! Aya mogo kaisã bagai asiyou fenẽ! Mala solo tamo ifenẽdiya nẽ are yeir, aya bun ibodok, anĩ nigin, aya, tamo mugu mugu ereb age difen kilei anĩ afenẽdiyof.

¹³ Aya uyulil ado idikeleya, uyulil nẽ ado dumen bagai nẽ, gariya ado idikeleya.

¹⁴ “Idi dogo neid kolos meluk kulo difef, anĩ bunem, idi mata ifenẽya nẽ aa bun iley a nigin ado, taun nẽ bobog bunem taun namen iley a nigin kisi feleya, are idi el fedif.

¹⁵ Mayarẽ difaref are, idi gaũ, idi idegẽya bunem kosẽ dedig, noli tobonunã dinodig, tamo dukesidig, idegẽya waitou yana dalesedig ado, idi ganan idegẽya nigin waud laaf fen, age difedig anidi.

¹⁶ “Aya, Jesus, ayam kurõ fesiya od enei sios nigin afeneĩf nigin, ã bun neu engel sur afen. Aya

Dawid nē Warumutei ado Ibor, Bonimei nē Barisa medeīya.”

¹⁷ Awa Uur ado kayau mois dirok, “Usi!” Aib taka ī karī yef, irōf, “Usi!” Aib taka ī naan ail fef, utornēg len, ī isiyouf. Aib taka ī orof, utornēg len, ī mata ifenēya nē naan ege luwa yalouf.

¹⁸ Aya, idi ganan buk enei nē profet od karī def anī, totol bagai arokenēdif: Aibem taka od enei teten ereb taka tobol fouf, Negur ī daū fiya nē sesen buk enei bun itoton anī, ī bun tobol fouf.

¹⁹ Agef fen, aib taka profet od nē buk enei bun od taka yalelauf, Negur ī, mata ifenēya nē aa ado taun fateul, buk enei bun faded fel itoton anidi bun tamal, ī yalelnēf.

²⁰ Taka ī enei ganan kurō fesif, are irok, “Moi, aya mogo kaisā bagai asiyou fenē.”

Moi. Odug Jesus usi.

²¹ Odug Jesus nē wau ifenēya, Negur nē tamo kayau bun ibodōf. Moi.

Mata Ifeněya Ně Od
The New Testament in the Marik Language of Papua
New Guinea
Nupela Testamen long tokples Marik

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 18 Apr 2025 from source files dated 31 Aug 2023

d7099f9d-3bdf-5620-8eb3-7e6c51cab7ea